

QVÆSTIO MEDICA

QVODLIBETARIIS DISPVATIONIBVS MANE DISCVTIENDA

IN SCHOLIS MEDICORVM DIE IOVIS XIV. NOVEMB.

M. MICHAELE DENYAV, Doctore Medico Præsede.

1087

Est ne solus sanguis purus corporis nostri alimentum?

SANGVIS iure dicitur thesaurus vitæ quæ est animæ eiusque organi corporis per unionem vniuscuiusque actus seu ^{inmixtionis} ac in caloris cum humore societate sita esse perhibetur, hinc animalia sanguine prædita exanguibus calidiora sunt, & inter sanguinea vberiori calore vigent quæ multo abundant sanguine, eoque exhausto totius corporis partes frigescent, vitæque priuantur: nativum calorem fouet ac tuetur, siue à corde illum ad omnia membra deriuando, siue vaporibus calidis, qui ex ipso caloris iugi & perenni actione singulis momentis procedunt, siue potissimum spiritu vitali ex eo in corde genito, & per arterias influente, ac demum quia caloris partibus omnibus viuentibus ingenti pabulum est singulare, quo deficiente nullomodo posset tum vita, tum animalium omnis operatio subsistere, sanguis quippe spiritui confert, spiritus sensibus, sensus rationi, atque vt viuens ab anima, sic pendet à sanguine cui naturalis est inditus calor & spiritus humoris primigenio consocialis, corporis & animæ vinculum, præcipuum obeundarum actionum instrumentum.

CONSTAMVS iisdem quibus nutrimur, eandem oportuit nutritionis esse materiam, quæ generationis fuit & compositionis, & ex qua primum substantiâ conflata fuerunt corpora nostra, eadem postmodum necessario seruari & nutrirî debent: communis omnium parens natura, erudita, prouida & sagax licet à nullo edocta, vt ab utroque parente semen in utrum iniectum, conceptum, animatum, tutius firmiusque complecteretur, effecit vt per venas arteriasque vmbilicales iam distincta genitura in ista quadam virtute maternum sanguinem menstruum, nimis duntaxat quantitate excrementum, ad se traheret & alliceret, eumque purissimum ac dulcissimum; qui primum in hepar fontem grariorum humoris refusus, tum in cor vitæ principium, caloris & viuifici nectaris originem sensum illabens, mox etiam in reliquas partes carnosas refluens, ipsas eodem illo ordine implet & extendit, auget spermaticas, & in omnium nutritionem conuertitur, sæctum quoque ipsum, cui nullus est certus in lucem proeundi terminus, sustentat.

ALIMENTVM omne dulce sit necesse est, hoc vnico humore ad sui alimoniam vitæ natura, omnisque vita calore & humore sustinetur, ex humoribus omnibus solus sanguis purus his duabus gaudet dotibus; bilis amara est, calida & sicca; Melancholia acida, frigida & sicca, quæ qualitates non vitæ prorogandæ ac conseruandæ sunt idoneæ, sed morti accelerandæ præsto sunt, pituita insipida, frigida & humida, nec satis cocta, suapte indole vitæ potius noxia est, neque nutrit quandiu adest sanguis, neque eo consumpto & exhausto potest ipsamet vllum suggerere alimentum, nisi magis elaborata mutetur in sanguinem, quo velut benigno & dulci humore corpora reficiantur: hic solus humor temporis progressu ab interno & nativo calore nunquam otiantem magis coctus in sanguinem cedere potest & nutrire; neutra bilis potest, flaua nimis adusta est & sicca, & per incediam amarior redditur, atra vero terrea est & sicca: vitæque temperari & corrigi quodammodo potest, & ad qualitatum mediocritatem adduci, substantiæ tamen benignitatem nunquam assequitur, quæ in corporis nutrimentum facessere valeat.

QUANTVM in iccore humor melancholicus & biliosus à sanguine secernantur, & in liene ac cysti fellis velut propriis conceptaculis recipiantur, ne quod in iis nimis sæculentum est & sordidum animali obesset, si per corpus dispergeretur, aliquid tamen eorum retinetur, quod per venas simul cum sanguine in totum corpus distribuatur, bilis quidem est velut stimulus ad impellendum alimentum, & expellendum excrementum, sanguinem in venis tenuiorem reddit, vt angustos partium meatus peruat, eiusque distributionem promoueat: Melancholia non solum innatâ sibi acciditate pungendo ventriculum appetentiam cibi excitat, orificium superius ventriculi constringit, eumque totum contrahit, vt exactè cibum complectatur, sed dum simul cum sanguine permista est, retentricem facultatem frigore & siccitate roborat, sanguinem cogit, & solidioribus membris omnino adiungit, vt facilius sit ac perfectior in illorum substantiam ac naturam conuersio: Pituita non modò à præmaturâ siccitate vindicat, sed sanguinis defectum & alimenti locum supplet, calorisque voracitati obstitit, hinc alendo corpori futura, si necessitas exigit, idonea per venas in vniuersum corpus diffunditur; humores tamen isti nativo calori & humido radicali restaurando suoque genio nequaquam pares esse possunt; imò contrarias & repugnantes profusus habent qualitates, inficere potius quàm rescicere possunt.

NUTRITIO si quidem est alimenti in propriam corporis viuentis substantiam vi animæ & nativi caloris transmutati vnio naturalis vt reparatur id quod absimitur, non elementa, odores, metalla aut lapides alunt, nutrimentum corpus est facultate animatum, ita tamen vt actu animatum fieri possit, corpori alendo tum contrarium, tum simile, ea tantum quæ vixerunt nobis nutrimentum præbent, vt plantæ, animalia, aut quæ ab his decerpta sunt: non chylus, sed solus sanguis est naturæ condimentum ac delicia, nihil quidquam illi gratius sapit, qui maximâ ex parte suis excrementis expurgatus per venas in singulas partes hepatis eo abundè satiati virtute expultrice pellitur, ab illis etiam ob summam substantiæ eum eo similitudinem trahitur, quo tracto perfruuntur, & intercedentibus præuiis mutationibus nutriuntur: sanguinis natura tota optima est, & ita temperata, vt tanquam ex quatuor elementis compositus quasdam habeat crassiores & terreas magis partes, alias tenuiores & aëreas, alias aquæ & igni respondentes: Quæ omnes vel in purissimo sanguine obseruantur; adeo vt ex crassioribus illius partibus crassiora membra, ex tenuioribus tenuiora formentur ac nutriantur, & qui omnem absoluit alimenti transmutationem calor, minimè sit vrens aut afflans, cuiusmodi est igneus, sed elixans, qui alimentum efficit calidum & humidum, quæ temperies soli sanguini propria est.


Ergo solus sanguis purus est corporis nostri alimentum.

DOMINI DOCTORES DISPVATVRI.

M. Petrus Regnier.
M. Ioannes Hamon.
M. Ioannes Maurin.

M. Simon Boulot.
M. Claudius Tard.
M. Ioannes Forestier.

M. Ioannes de Bourges Profess. Botan.
M. Franciscus Boujonnier Profess. Pharm.
M. Franciscus Mandat.



Proponebat Lutetiæ PETRVS POVRRET Prouincialis, A. R. S. H. M. DC. LVIII.